



Na osnovu člana 24. stav 1. tačka b) Ustava Tuzlanskog kantona ("Službene novine Tuzlansko-podrinjskog kantona", br. 7/97, 3/99 i "Službene novine Tuzlanskog kantona", br. 13/99 i 10/00), na prijedlog Vlade Tuzlanskog kantona, Skupština Tuzlanskog kantona, na sjednici održanoj 28.3.2002. godine, donosi

## **Z A K O N**

### **O IZVRŠENJU BUDŽETA TUZLANSKOG KANTONA ZA 2002. GODINU**

#### **I OPĆE ODREDBE**

##### **Član 1.**

Ovim Zakonom uređuje se način izvršavanja budžeta Tuzlanskog kantona za 2002. godinu (u daljem tekstu: Budžet), i finansijskih planova izvanbudžetskih fondova, upravljanje prihodima i izdacima Budžeta, zaduživanje, računovodstvo i nadzor Budžeta.

##### **Član 2.**

Budžet se sastoji od općeg i posebnog dijela.

Opći dio Budžeta se sastoji od bilansa prihoda i izdataka, a posebni dio sadrži detaljan raspored izdataka po budžetskim korisnicima i vrsti izdataka.

##### **Član 3.**

Budžet je procjena godišnjih prihoda i primitaka te utvrđenih iznosa izdataka i drugih plaćanja Kantona, koje donosi Skupština Kantona.

##### **Član 4.**

Budžet se odnosi i važi za fiskalnu 2002. godinu (u daljem tekstu: fiskalna godina).

Fiskalna godina počinje 1. januara, a završava 31. decembra 2002. godine.

##### **Član 5.**

Budžetski korisnici su ministarstva, drugi organi uprave i upravne ustanove i ostali čije je finansiranje iz Budžeta predviđeno posebnim propisom (u daljem tekstu: korisnici).

Ministarstvo koje u svom budžetskom razdjelu sadrži potrošačke jedinice - glave i budžetski je za njih nadležno.

Vanbudžetski fond je pravno lice na osnovu zakona, koje se finansira iz namjenskog poreza i neporeznih prihoda, odnosno doprinosa.

Vanbudžetskim fondovima, u smislu ovog Zakona, smatraju se: Zavod zdravstvenog osiguranja Tuzlanskog kantona, Direkcija za zaštitu okoliša, Direkcija za puteve, kao i drugi fondovi uspostavljeni po zakonu.

Ministarstvo finansija će donijeti Registar budžetskih korisnika, i isti će se objaviti u "Službenim novinama Tuzlanskog kantona".

##### **Član 6.**

Transakcije svih prihoda i izdataka iz Budžeta se evidentiraju, u skladu sa federalnim propisima i na osnovu njih donesenim propisima Kantona, a iste se evidentiraju u Glavnoj knjizi trezora.

##### **Član 7**

Budžetski izdaci podmiruju se iz prihoda i primitaka, utvrđenih ovim Zakonom.

Sa budžetskog računa ne smiju se isplaćivati izdaci koji nisu predviđeni.

Vlada Kantona može odgoditi rok plaćanja nekog potraživanja Budžeta, ili dopustiti plaćanje u obrocima, uz prethodno pribavljeno mišljenje Ministarstva finansija i resornog ministarstva.

#### Član 8.

Svi javni prihodi i primici Budžeta, uključujući i prihode, koje korisnici budžeta ostvaruju obavljanjem osnovne djelatnosti, moraju se uplaćivati na depozitne račune javnih prihoda Budžeta Kantona i iskazati po izvorima iz kojih potiču.

Uplate, po osnovu ostvarenih prihoda obavljanjem osnovne djelatnosti budžetskih korisnika, evedentirat će se kao vlastiti prihod svakog budžetskog korisnika u Glavnoj knjizi trezora.

Korisnici Budžeta su obavezni da, prilikom izrade svog dijela Budžeta, planiraju rashode, koji će biti pokriveni iz prihoda od obavljanja osnovne djelatnosti.

Prihodi, koje korisnici Budžeta Kantona ostvare od obavljanja osnovne djelatnosti po posebnim propisima, uplaćuju se u Budžet Kantona.

Izuzetno, od stava 4. ovog člana, prihodi od naknade korisnika usluga ostvarenih na tržištu od obavljanja osnovne djelatnosti po posebnim propisima, prihodi su budžetskih korisnika. Mjerila o namjeni korištenja tih prihoda propisat će se Pravilnikom iz člana 48. ovog Zakona, a na prijedlog korisnika.

#### Član 9.

Svi izdaci moraju biti utvrđeni u Budžetu i uravnoteženi s prihodima i primicima.

Uravnoteženje Budžeta provodi se putem izmjena i dopuna Budžeta po postupku za donošenje Budžeta.

## II IZVRŠAVANJE BUDŽETA

#### Član 10.

Sredstva Budžeta osiguravaju se budžetskim korisnicima koji su, u posebnom dijelu Budžeta, određeni za nosioce sredstava na pojedinim pozicijama.

Korisnici budžetska sredstva koriste samo za namjene koje su određene Budžetom, i to do visine utvrđene u njegovom posebnom dijelu.

#### Član 11.

Korisnici budžetska sredstva koriste u skladu sa svojim godišnjim finansijskim planom, a po dinamici utvrđenoj tromjesečnim planovima izvršenja Budžeta.

Korisnici moraju, pri dogovaranju o uslovima za ispunjavanje obaveza koje se podmiruju iz Budžeta, uzimati u obzir tromjesečne planove izvršenja Budžeta.

Korisnici moraju, prije potpisivanja ugovora čije se obaveze podmiruju iz Budžeta, dobiti pismenu saglasnost Ministarstva finansija.

#### Član 12.

Godišnji budžet izvršava se do 31. decembra fiskalne godine.

Samo prihodi naplaćeni u tekućoj fiskalnoj godini su prihodi te godine.

Finansijske obaveze koje ne budu podmirene do 31. decembra fiskalne godine, a koje se podmire do kraja januara naredne godine, smatraju se izdacima godine u kojoj su obaveze i nastale.

Sredstva, koja se za izmirenje obaveza iz fiskalne godine isplate nakon 31. januara naredne godine, smatraju se izdacima naredne fiskalne godine.

Finansijske obaveze iz predhodnih fiskalnih godina, izuzev finansijskih obaveza nastalih po osnovu neisplaćenih plaća, naknada zaposlenim, ispostavljenih faktura, ugovorenih obaveza i refundacija bolovanja, neće se izvršavati, izuzev po posebnoj odluci Vlade Kantona.

#### Član 13.

Postupak nabave robe, usluga i izvođenje radova mora se obavljati u skladu sa Uredbom o postupku nabavke robe, uslugama i ustupanju radova ("Službene novine Federacije BiH", br. 31/98).

#### Član 14.

Budžet se izvršava na osnovu tromjesečnih planova izvršenja Budžeta, u skladu sa njegovim likvidnim mogućnostima, i po sljedećim prioritetima: plaće, materijalni troškovi, socijalna davanja licima u stanju socijalne potrebe i dopunska prava BIZ-a.

#### Član 15.

Korisnici preuzimaju obaveze za koje su sredstva namjenski iskazana u posebnom dijelu Budžeta, ako je njihovo plaćanje usklađeno sa tromjesečnim planovima izvršenja Budžeta.

Izuzetno, zbog neusklađenog priliva sredstava u Budžet prema tromjesečnim planovima izvršenja Budžeta, Ministarstvo finansija može izmijeniti dinamiku doznake sredstava pojedinim korisnicima, uz saglasnost Vlade Kantona.

#### Član 16.

Ministarstvo finansija izvršava obaveze po dinamici utvrđenoj tromjesečnim planovima i dostavljenim mjesečnim zahtjevima sa listom prioriteta po korisnicima i izdacima, u skladu sa raspoloživim sredstvima, čime se, ujedno, utvrđuje dinamika izvršavanja Budžeta.

#### Član 17.

Ministarstvo finansija dostavlja korisnicima tromjesečne finansijske planove izvršenja Budžeta najkasnije 10 dana prije početka tromjesečja na koji se finansijski plan odnosi.

Korisnici su obavezni Ministarstvu finansija dostaviti svoje mjesečne zahtjeve za trošenje sredstava Budžeta zajedno sa neophodnom dokumentacijom i listom prioriteta, do sedmog u mjesecu za tekući mjesec.

#### Član 18.

Ministarstvo finansija prenosi neutrošena sredstva po pojedinim stavkama izdataka iz tromjesečnog plana izvršavanja Budžeta, na ime iste stavke u plan izvršavanja Budžeta za slijedeće razdoblje u okviru fiskalne godine.

#### Član 19 .

Izuzetno, izdaci koji nisu predviđeni tromjesečnim planom izvršavanja Budžeta, ili izdaci koji zahtijevaju prekoračenje pojedinih stavki u tromjesečnom planu za izvršavanje Budžeta (u daljem tekstu: neraspoređeni izdaci), mogu se podmiriti odlukom Vlade na prijedlog Ministarstva finansija.

#### Član 20.

Nalogodavac za izvršenje Budžeta po odobrenim budžetskim pozicijama je predsjednik Kantona, predsjednik Vlade Kantona i ministar finansija.

Naredbodavac za finansijske planove Budžeta po odobrenim budžetskim pozicijama su predsjednik Kantona, Vlada Kantona, predsjednik Vlade Kantona, ministri i rukovodioci drugih korisnika iz člana 5. ovog Zakona.

#### Član 21.

Hitni i nepredviđeni izdaci, koji se pojave tokom budžetske godine, podmiruju se iz sredstava rezerve utvrđene Budžetom. O korištenju sredstava tekuće rezerve odlučuje Vlada Kantona.

Izuzetno, u opravdanim slučajevima, kada nije moguće blagovremeno sazvati sjednicu Vlade Kantona, predsjednik Kantona i predsjednik Vlade Kantona mogu raspolagati sredstvima tekuće rezerve, svaki do iznosa 250.000 KM u toku fiskalne godine.

Predsjednik Kantona i predsjednik Vlade Kantona, obavezno mjesečno izvještavaju Vladu Kantona o raspolaganju sredstvima iz stava 3. ovog člana.

Vlada Kantona jednom tromjesečno izvještava Skupštinu Kantona o korišćenju sredstava budžetske rezerve.

#### Član 22.

Prihodi ostvareni iznad planiranih Budžetom, usmjerit će se u tekuću rezervu.

#### Član 23.

Sva prikupljena i naplaćena finansijska sredstva, koja pripadaju Budžetu, obavezno se uplaćuju na Jedinostveni račun

riznice (u daljem tekstu : JRR).

JRR može da ima više podračuna.

Sa JRR-a se ne može isplatiti ni jedan izdatak ukoliko nije odobren Budžetom.

#### Član 24.

Pogrešno ili više uplaćeni javni prihodi, vraćaju se uplatiocima iz tekućeg priliva uplatnog računa na koji su isti pogrešno ili više uplaćeni, ili sa računa korisnika prihoda, ako tekućeg priliva nema ili je funkcija uplatnog računa prestala. Rješenje o povratu sredstava iz stava 1. ovog člana donosi Ministarstvo finansija.

#### Član 25.

Vlada Kantona, u skladu sa svojim propisima, kriterijima ili programima, raspoređuje sljedeća sredstva:

1. Kapitalni izdaci za korisnike budžetskih sredstava - potrošačka jedinica 121004;
2. Korisnici iz oblasti kulture - odjeljenje 2191;
3. Tekući transferi iz dopunskih prava BIZ-a - potrošačka jedinica 261002;
4. Kapitalni transferi za kantonalne robne rezerve - potrošačka jedinica 321001;
5. Tekući transferi općinama - odjeljenje 331;
6. Ostali mediji Tuzlanskog kantona - odjeljenje 382;
7. Sredstva za materijalno zbrinjavanje viška zaposlenika - potrošačka jedinica 121011;
8. Jednokratne pomoći u oblasti socijalne politike i zaštite - potrošačka jedinica 401009 - prenosom na centre za socijalni rad;
9. Podrška povratku prognanih lica - potrošačka jedinica 431002;
10. Materijalno zbrinjavanje socijalno ugroženih - potrošačka jedinica 431003;
11. Sredstva za organizacije, manifestacije i pojedince, čija raspodjela dosad nije regulisana posebnim propisom.

Vlada Kantona odmah izvještava Skupštinu Kantona o donesenim propisima, kriterijima ili programima iz stava 1. ovog člana.

Sredstva se mogu koristiti nakon donošenja propisa, kriterija ili programa, iz stava 1. ovog člana.

#### Član 26.

Za obavljanje platnog prometa ministar finansija će zaključiti ugovor sa ovlaštenom organizacijom platnog prometa kojim će se regulisati: usluge koje će pružati ovlaštene organizacije platnog prometa, izvještaje i rokove dostave istih i iznos naknade koja će se platiti ovlaštenoj organizaciji platnog prometa za obavljanje ovih usluga.

### III KONTROLA IZVRŠENJA BUDŽETA

#### Član 27.

Ministri su odgovorni za interni nadzor ministarstva i budžetskih korisnika, koji spadaju u njihovu nadležnost.

Ministarstvo finansija vrši nadzor računovodstvenih dokumenata ministarstava, budžetskih korisnika i izvanbudžetskih fondova.

#### Član 28.

Najkasnije do kraja septembra, Vlada Tuzlanskog kantona izvještava Skupštinu o polugodišnjem izvršenju Budžeta u fiskalnoj godini i nalazima revizije, a do kraja aprila naredne godine, o izvršenju Budžeta i nalazima revizije u fiskalnoj godini.

Istovremeno sa izvještajima o izvršenju Budžeta, Skupštini se podnose izvještaji o finansijskom poslovanju kantonalnih izvanbudžetskih fondova.

#### Član 29.

Kontrolu nad finansijskim, materijalnim i računovodstvenim poslovanjem korisnika, primjene zakonitosti u poslovanju, kao i namjenskom upotrebom budžetskih sredstava i vanbudžetskih fondova, obavlja Odjeljenje interne revizije.

#### Član 30.

Odjeljenje interne revizije se nalazi u sastavu Ministarstva finansija.  
Radom Odjeljenja interne revizije rukovodi glavni unutrašnji revizor, kojeg na prijedlog ministra finansija, imenuje Vlada Kantona.

#### Član 31.

Na godišnji plan rada Odjeljenja interne revizije saglasnost daje Vlada Kantona, i dostavlja ga nadležnim skupštinskim tijelima.

### IV ZADUŽIVANJE I DUG

#### Član 32.

Kanton se može zaduživati u zemlji ili inostranstvu, u svrhu finansiranja kapitalnih investicionih izdataka i pokrivanja budžetskih deficita.

Kanton može izdavati jemstva.

Odluku o zaduživanju i davanju jemstva iz stava 1. ovog člana, donosi Skupština Kantona.

Iznos zaduženja iz stava 1. ovog člana, ne može biti veći od 20 % ukupnih prihoda Budžeta, uključujući iznos jemstva iz stava 2. ovog člana.

Ugovor o zaduživanju Budžeta i izdavanju jemstva potpisuje ministar finansija.

#### Član 33.

Ministarstvo finansija vodi popis duga, izdatih jemstava i zajmova, a evidentira ih u sistemu Glavne knjige riznice.

#### Član 34.

Odluke o dugu, jemstvima i zajmovima objavljuju se u "Službenim novinama Tuzlanskog kantona".

Vlada Kantona ne može jednostrano mijenjati ugovorene uslove duga, jemstva i datih zajmova.

#### Član 35.

Sa računa Budžeta Kantona, mogu se, u smislu ovog Zakona, podmirivati sve kamate i otplata glavnice po dugu i jemstvima Kantona, sa uslovima i rokovima koje je ugovorio Kanton.

### V KAZNENE ODREDBE

#### Član 36.

Odgovorno lice budžetskog korisnika ili izvanbudžetskog fonda, nosilac izvršne vlasti, kao i drugo lice odgovorno za Budžet Kantona, kaznit će se za prekršaj ovog Zakona, saglasno odredbama člana 57. Zakona o proračunima - budžetima u Federaciji Bosne i Hercegovine ("Službene novine Federacije Bosne i Hercegovine", br. 20/98).

### VI ZAVRŠNE ODREDBE

#### Član 37.

Ministar finansija će donijeti podzakonske akte u cilju sprovođenja ovog Zakona, u roku od 45 dana od dana donošenja ovog Zakona.

#### Član 38.

Na sva pitanja koja nisu regulisana ovim Zakonom, a tiču se načina izrade, donošenja, izvršavanja Budžeta i finansijskih planova izvanbudžetskih fondova, zaduživanje, duga računovodstva i nadzora Budžeta, primjenjivat će se odredbe Zakona o proračunima - budžetima u Federaciji Bosne i Hercegovine ("Službene novine Federacije BiH", br. 20/98).

Član 39.

Ovaj Zakon stupa na snagu danom objavljivanja u "Službenim novinama Tuzlanskog kantona".

**B o s n a i H e r c e g o v i n a**  
**- Federacija Bosne i Hercegovine -**  
**T U Z L A N S K I K A N T O N**  
**S k u p š t i n a**  
**Broj: 01-02-166-13/02**  
**Tuzla, 28.3.2002.g.**

**Predsjednik**  
**Skupštine Tuzlanskog kantona**  
**Dr. Izet Žigić**